

Dr. Joel Rajnherc

Centro di Oncologia na ImSan lo ta un beneficio grandi pa Aruba



ORANJESTAD (AAN): Si-man pasa dr. Joel Rajnherc, director di ImSan hunto cu señor Rudgerboom di Atlas a duna un presentacion di e vision y metanan di ImSan na e parlamentarionan di e comision fiho di parlamento pa loke ta trata Salubridad y na e otro parlamentarionan cu tabata presente. Minister dr. Alex Schwengle, AZV y Aruba Investment Bank (AIB), tabata presenta na e presentacion aki.

E enfoke tabata di e realisacion di e Centro di Radioterapia cu ayudo di e partner di ImSan cu ta Baptist Health South Florida. Director di ImSan, dr. Joel Rajnherc, a keda satisfecho con e presentacion a worde ricibi door di esunnan presente. Mirando e preguntanan cu a worde haci ta evidente con hopi positivo e reaccionnan tabata. E presentacion no tabata pa pidi gobierno placa, pero cu e sosten di parlamento lo bira

posibel pa haya un contracto cu AZV di hopi aña cual ta un requisito necesario pa obtene e financiamiento pa e proyecto aki. Al momento segun e ley di AZV lo por cera solamente contractonan di maximal 2 aña.


Cancer te ainda ta e primordial enfermedad cu ta causa morto di 8.2 miyon hende na mundo na 2013. Ta premira cu e cifranan aki lo sigui crece y na aña 2030 lo conoce un aumento di 70 porciento y Aruba lo no ta un excepcion.

Basa riba e cifranan di incidencia di Cancer na Aruba cu ta alrededor di 0,40 % di e poblacion ta realistico pa tin un Centro di Radioterapia na Aruba. Mirando e estilo di bida y e vergrijzing di nos poblacion no ta di spera cu e incidencia lo baha.

“E vision cu nos tin, ta cu ImSan lo ta pa Aruba - y un ehempel pa Caribe, e luga unda bo ta bay pa tratamento di e malesanan no contagioso, e NCDs. E enfermedadnan aki ta stroba bo no solamente den e edad cu bo por yega, pero tambe den e placer di bo bida cu bo ta bay pasa bo ultimo añanan,” segun Dr. Joel Rajnherc.

E meta ta pa adkiri un “linear accelerator” y tur otro ekipo incluyendo un “CT-scanner”, cu lo haci posibel e tratamiento di radioterapia, o sea ‘bestraling’ y e control necesario di e efectonan di tratamiento cu e pashent a ricibi. Actualmente Aruba ta manda mas of menos 200 pashent pa tratamento di radioterapia pa Colombia of Corsou y den casonan mas complica ta manda e pashentnan Hulanda y excepcionalmente Merca.

“A bira bon cla cu tanto e parlamentarionan di e comision fiho como e otro par-



lamentarionan ta sostene e proyecto importante aki. Tur hende presente a compronde e vision di ImSan y tambe ta wak e necesidad pa ImSan por ofrece e servicicionan di un centro di oncologia, y particularmente tratamiento di radioterapia na Aruba mes pa nos comunidad.

Ofrece tratamiento di radioterapia (bestraling) na Aruba mes berdaderamente no ta un luho mas, pero un necesidad, Rajnherc a subraya. El a splica cu ImSan lo por ofrece tratamiento na entre 350 pa 400 pashent pa aña cu un “linear accelerator”; como cu Aruba pa aña tin alrededor di 200 pashent cu ta haya radioterapia, ta keda espacio pa ofrece e servicio aki na

pashentnan di otro paisnan den nos region.

Dr. Rajnherc a agrega cu aki ta trata no solamente di pashentnan cu lo por bin di otro islanan di Caribe Hulandes, pero tambe di otro islanan y paisnan den nos region pa medio di contactonan di Baptist Health South Florida.

For di momento cu ImSan haya “green light” pa realisa e proyecto aki, lo tuma 18 pa 20 luna pa construi y ekipa e centro di radioterapia pa e por ta cla pa cuminsa funciona. Dr. Rajnherc a finalisa bisando cu tur cos ta mustra, despues di e presentacion di siman pasa, cu parlamento lo haci di nan parti lo necesario pa e proyecto aki por worde realisa.